

20/09/1998

Ratu gimnas mengagumkan

TIADA perkataan tepat untuk diungkapkan mengenai persembahan mengagumkan daripada puteri gimrama negara yang dikalungkan pingat emas berpasukan di Stadium Putra, semalam.

Kejayaan mengatasi saingan sengit Kanada dan Australia, mengangkat martabat rangkaian Malaysia itu selaku yang terbaik.

Daripada ganingan yang tidak diberi harapan untuk meraih emas, Thye Chee Kiat, Carolyn Au Yong, El Regina Tajuddin serta Sarina Sundarajah membuktikan sebaliknya dengan persembahan serba memukau.

Malah, ia adalah kejayaan bersejarah buat ratu gimrama negara setelah Malaysia gagal meraih pingat dalam acara gimnastik artistik.

Kejayaan itu turut diraikan oleh Perdana Menteri, Datuk Seri Dr Mahathir Mohamad, dan isteri, Datin Seri Dr Siti Hasmah Mohd Ali, dengan mengalungkan pingat kepada pemenang.

Turut sama meraikan mereka ialah Menteri Belia dan Sukan, Tan Sri Muhyiddin Mohd Yassin.

Bermula dengan penonjolan sebagai antara pencabar yang perlu dihormati oleh pasukan pilihan, Kanada serta Australia, rangkaian gimnas negara membuktikan betapa ramalan itu bertepatan.

Malah, daripada belunggu kontroversi yang menyelubungi pemilihan empat ratu gimrama sebelum ini, mereka jelas bersemangat untuk membuktikan keupayaan, sekali gus mengetepikan segala prasangka.

Rangkaian gimnas negara mengumpul 93.023 mata, mengatasi Kanada, pemenang emas di Victoria, 92.962 mata, serta Australia di tempat ketiga, 92.937 mata.

Jurulatih, Irina Gabishvili, mengakui dia memang menjangkakan anak didiknya mampu memenangi emas.

"Saya gembira dengan kejayaan mereka. Mereka melakukan yang terbaik dan kejayaan ini adalah hasil usaha mereka yang sanggup bekerja keras. Inilah hasilnya," katanya.

Sementara Chee Kiat, Carolyn, El Regina serta Sarina mengakui sokongan penonton jelas menyemarakkan semangat mereka.

"Kami amat gembira dengan sokongan ini. Tanpa mereka, tidak mungkin kejayaan ini diperolehi. Terima kasih semua dan kami harap ia akan berterusan esok (hari ini)," kata Chee Kiat.

Dalam empat disiplin yang perlu dilakukan - gelung, belantan, reben dan tali - hanya 10 markah terbaik menjadi hitungan setiap gimnas setiap pasukan.

Ketika disiplin awal gelung serta tali, mereka tampak menggambarkan penguasaan awal apabila mendahului kutipan mata dengan 55.936 mata berbanding Australia (55.237) dan Kanada (55.199).

Chee Kiat menjadi gimnas paling memikat apabila mengumpul mata tertinggi dalam gelung dan tali (9.575), belantan (9.500) dan reben (9.200).

Carolyn tidak kurang cemerlang dalam gelung (9.312), tali (9.262), reben (9.200) dan belantan (9.275) sementara El Regina yang dipertaruhkan melakukan tiga disiplin, mengumpul 9.062 (tali), gelung (9.350) dan reben (8.900).

Sarina pula hanya mampu mendapat 8.787 mata dalam belantan tetapi sudah cukup untuk memenangi emas berdasarkan 10 catatan terbaik yang dikumpul - masing-masing empat daripada Chee Kiat dan Carolyn manakala dua daripada El Regina dengan himpunan 93.023 mata.